

Mahathir gesa umat Islam jadi contoh

KUALA LUMPUR, Rabu -- Perdana Menteri, Datuk Seri Dr Mahathir Mohamed menggesa umat Islam supaya menghidupkan semula amalan-amalan yang murni untuk membuktikan kemuliaan agama Islam.

"Iniperlu agar umat Islam dapat menjadi contoh kepada masyarakat bukan Islam untuk menilai agama Allah SWT dalam

perspektif yang sebenarnya," katanya dalam perutusan di buku cenderamata sempena perayaan Maulud Nabi tahun ini.

Perdana Menteri berkata, sifat kesederhanaan, seperti tema sambutan Maulud Nabi tahun ini 'Islam Mengajarkan Kesederhanaan' sebenarnya adalah sifat yang membuktikan kemuliaan agama Islam.

"Malangnya sejak

beberapa lama hingga sekarang, perkara ini telah diputar-belit dan diselewengkan oleh pihak yang memusuhi atau mencurigai agama Islam.

"Islam sebagai agama yang mulia digambarkan sebagai kejam, ganas, tidak bertolak ansur dan tidak berperikemanusiaan, seolah-olah ia tidak mungkin mewujudkan suasana harmoni," ujarnya.

Katanya, gambaran salah itu sebahagian besarnya berpunca daripada penyebaran maklumat yang tidak betul disebabkan niat jahat pengkaji Islam yang memusuhi Islam.

Dalam pada itu pula, katanya, gambaran salah itu juga berpunca daripada sikap umat Islam sendiri yang kurang memaham dan mengamalkan kehendak ajaran Islam.

Murni

Kemuliaan Islam dalam menyeru kepada melakukan perkara-perkara murni seperti amanah, rajin, tekun, ikhlas, sabar dan setia seolah-olah menjadi amalan di luar masyarakat Islam, tambahnya.

Sementara itu, Menteri Wilayah Persekutuan, Datuk Shahril Abdul Samad dalam perutusan pula berkata, konsep kesederhanaan yang dianjurkan oleh Islam ialah melekat dan mewujudkan keseimbangan dalam segala tindak-tanduk demi kebaikan manusia.